

DESEMBER 2012

	Telefoon	Faks
Hermanus	028 313 8000	028 312 1894
Gansbaai	028 384 8300	028 384 0241
Kleinmond	028 271 8400	028 271 4100
Stanford	028 341 8500	028 341 0445

24 Uur Beheerkamer	028 313 8000/8111
Brandweer	028 312 2400

Bulletin

Amtelike nuusbrieff van die Munisipaliteit Overstrand



DE BOS-DAM LOOP OOR

Die De Bos-dam het op 20 Oktober vanjaar vir die eerste keer in drie jaar tot 100% gestyg en vir weke daarna nog aanhoudend oorgeloop. Daarmee is groot verligting gebring vir watervoorsiening in veral die Groter Hermanus area, wat twee jaar lank onder groot druk verkeer het weens 'n langdurige droogte in die opvangsgebied van die Onrusrivier-opvangsgebied. Inwoners hul samewerking gegee deur watervruiet met meer as 20%, tot 2005 se verbruiksvlakke, te verminder. Die ontwikkeling van boorgatvelde as alternatiewe bron het weliswaar ook gehelp om die druk op die dam te verlig deurdat vier produksie-boorgate by die Gateway-boorgatveld teen die einde ten volle benut is. Nog 7 nuwe produksie-boorgate in die Hemelen-Aarde Vallei word eersdaags bygevoeg. 'n Nuwe biologiese suiweringsaanleg vir die verwydering van yster en mangaan uit die boorgatwater is tans onder konstruksie. Die gesamentlike lewering van al die boorgate sal ongeveer gelykstaande aan die lewering van die De Bosdam wees. Beplanning van 'n aanleg vir die herwinning van drinkwater uit afvalwater is reeds ver gevorder, as 'n volgende opsie vir die uitbreiding van die munisipaliteit se waterbronne. Inwoners en besoekers moet in gedagte hou dat die Wes-Kaap as 'n water-skaars gebied beskou word en dat water altyd spaarsamig gebruik moet word. Besproeiing van tuine word nie tussen 09:00 en 17:00 toegelaat nie om onnodige verlies van water weens verdamping te voorkom.

WORD 'N GEMEENSAP WAT WERKLIK OMGEE

Mag ons almal 'n vreugdevolle en geseënde Kerstyd geniet.

Kom ons betoon welwillendheid teenoor mekaar. Kom ons bring kwaliteit-tyd saam met ons geliefdes deur, maar laat ons nie van die groter betekenis van hierdie tyd vergeet nie: Die koms van die Messias wat lig gebring het na 'n wêreld gehul in donkerle! Dit is die boodskap wat ons vandag nog meer nodig het as ooit tevore!

Om te help om die wêreld van misdadigheid, vrees, ongeregtheid en selfsugtige trots te bevry, hoef ons bloot die kern morele waardes na te volg wat 'n beskaafde samelewing ten grondslag lê. Dis so eenvoudig soos om betroubaar en verantwoordelik te wees in alles wat ons doen, respek te toon en regverdig op te tree in ons handelinge teenoor mekaar.

Op hierdie manier kan ons 'n gemeenskap word wat werklik omgee en waarin goeie burgerskap 'n natuurlike verskynsel is en nie 'n las nie.

Vrede vir almal!

Nicolette Botha-Guthrie
UITVOERENDE
BURGEMEESTER



GEÏNTEGREERDE ONTWIKKELINGSRAAMWERK 'N PLAN VIR DIE LANGTERMYN

Die Geïntegreerde Ontwikkelingsraamwerk (GOR) wat tans vir die Munisipaliteit Overstrand opgestel word, gaan nie net die huidige beleidsraamwerk hervorm nie, maar ook die behoefte aan langtermynbeplanning ondervang.

By die spesiale OMAF-vergadering op 31 Oktober 2012 het Burgemeester Nicolette Botha-Guthrie gesê die sleutelvraag wat die studie moet beantwoord is hoe die omgewing moet lyk waarin ons oor dertig tot veertig jaar wil woon en hoe ons dit moet bewerkstellig.

Die ontwikkelingsraamwerk moet leiding aan sowel die privaat- as die publieke sektor gee in terme van 'n ooreengekome langtermyn-strategiese ontwikkelingsrigting en nadat dit aangeneem is, sal alle belangwekkende ontwikkelingsvoorstelle aan die hand daarvan beoordeel word.

Die GOR sal gebruikersvriendelik wees en 'n Plan vir Menslike Nedersettings en 'n Omgewingsbeheersraamwerk insluit.

Onder leiding van Paul Olden van Urban Dynamics Western Cape is 'n span reeds besig om insette oor die sleuteluitdagings en -bedreigings vir die geïntegreerde ontwikkelingsraamwerk in te samel.

Hy is van mening dat die grootste uitdaging sal wees om die balans tussen ontwikkeling en bewaring te vind. Overstrand se ekonomie en ekologie is nie skeibaar nie, sê Paul, en die natuurlike omgewing is die gebied se enkele grootste ekonomiese bate.

Daar is wel geografiese areas met hoë armoede en werkloosheid is hoog onder die ongeskoolde en semi-geskoolde (seisoens)werkers. 'n Streeksbena-

dering tot ekonomiese diversifikasie sal gevolg moet word.

Paul glo die GOR sal die huidige beleidsraamwerk hervorm tot een wat geïntegreerd, samehangend, strategies en gebruikersvriendelik is. Daar sal veral aandag gegee word aan die sleuteluitdagings met betrekking tot Overstrand se stedelike, landelike en natuurlike omgewings. Die produk moet verseker dat die 5 jaar Geïntegreerde Ontwikkelingsplan in lyn met die 30 tot 40 jaar ruimtelike visie is.

Die volgende fase van die projek sal weer met 'n publieke werkswinkel in Junie 2013 gepaardgaan.

Insette oor sleuteluitdagings rakende Ons Mense, Ons Ekonomie, Ons Natuurlike Omgewing, Ons Landelike en Stedelike Omgewings en Ons Infrastruktuur en Fasiliteite kan per e-pos aan wilhelm@udwc.co.za gestuur word.

'N HEELJAAR-VAKANSIEBESTEMMING



**Uit die pen van die OTAK-voorsitter
- Craig Holmes**

U het waarskynlik al kennis geneem dat 'n nuwe toerisme-adviesliggaam op die been gebring is en as die Overstrand Toerisme Advieskomitee (OTAK) bekend staan. OTAK se rol is om die Overstrand-raad te adviseer oor die beste praktyke vir die bevordering van Overstrand se toerismestrategie en oor hoe om hierdie ongelooflike gebied in 'n heeljaar-vakansiebestemming te omskep.

Lede van OTAK het in die afgelope tyd twee verkennende toere deur die gebied onderneem om ten volle op die hoogte te wees van die merkwaardige verskeidenheid van natuurlike skoonheid, fasiliteite en infrastruktuur wat beskikbaar is om ons toerisme-ondernemings in die gebied te ondersteun.

Verskeie vergaderings het al plaasgevind en onderwerpe wat gewissel het van webtuistebemarking, die rol van toeristeburo's en die impak van feeste en gebeure is deeglik bespreek. Begrotings is nagegaan om te verseker dat die beskikbare fondse só aangewend word dat daar klinkende munt geslaan word uit elke rand wat vir die bevordering van toerisme na Overstrand gespanneer word. Ons

stel ook ondersoek in na hoe ons 'n groter sny van die toerismekoek vir ons gebied kan kry - nie net vanuit die buiteland nie, maar ook uit die binnelandse mark.

Ons Walviskus het so baie om aan te bied dat ons as Overstrand-inwoners met trots vakansiegangers kan verwelkom en aanmoedig om alles te ervaar. Moenie vergeet om u besoekers te vertel van ons wynroetes, Blouvlagstrande, die unieke Kaapse blomryk oftewel fynbos, belonende staproetes, gholfbane, puik restaurante en koffiewinkels, die haaiduikbedryf, voëlkykery, rotsklim en rivierbootvaart nie. U sal nie kan ophou praat nie!

Die nuwe jaar gaan vir ons in die komitee groot uitdagings bied, maar ons is toegewyd en niks gaan ons laat afsien nie van ons visie om van Overstrand 'n heeljaar-voorkeurbestemming vir vakansiegangers te maak - een waarin al die inwoners - groot of klein - besoekers sal verwelkom en die geleentheid om oor ons klein wonderwêreld te spog, deeglik sal benut.

Ons sal u gereeld op die hoogte van die jongste ontwikkelinge bring en ons suksesse met die verwesentliking van ons drome met u deel.

Blouvlag Suid-Afrika het sy twaalfde seisoen vir die bedryf van sy suksesvolle strandserifikasieprogram amptelik op 11 Oktober vanjaar op Grottostrand in Hermanus afgeskop. Grotto was een van 36 strande en 4 marina's wat Blouvlagstatus ontvang het. Dit was vir die elfde agtereenvolgende jaar en Grotto is tans die strand met die langste ononderbroke verbintenis met die Blouvlag-veldtog. Kleinmond- en Hawtonstrande het ook Blou Vlao ontvang. Walvisbesigtigingsbote is nou ook ingesluit by die program en twee plaaslike vaartuie, Whale Whisperer (Dyer Island Conservation Trust, Gansbaai) en Miroshka (Southern Right Charters, Hermanus) kan binnekort ook onder die gesogte vlag vaar. Die Blou Vlag word hier deur die Minister van of Toerisme, mnr Martinus van Schalkwyk, gehys met die bystand van waarnemende Burgemeester van Overstrand, raadsheer Pieter Scholtz, die Blouvlag-programdirekteur Malcolm Powell, en Morgan Griffiths, Blouvlagspekteur.



LIG BESOEKERS IN OOR AFVALBESTUUR HIER

Huiseienaars wat hulle eiendomme aan vakansiegangers verhuur, moet seker maak dat die huurders bewus is van die dae van vuilnisverwydering en oor hoe ons herwinning werk.

Die herwinningsprosedure is soos volg:

- Die Munisipaliteit verskaf deurskynende sakke aan inwoners waarin hulle al die herwinningsartikels - papier, karton, blikkies, glas en plastiek - moet plaas.
- Op die dag van vuilnisverwydering moet dié sak saam met die swart sakke uitgesit word.
- Elke keer as 'n inwoner 'n deurskynende sak uitsit, gee die Munisipaliteit weer 'n sak vir die inwoner vir die week se herwinning. 'n Beroep word op inwoners gedoen om seker te maak dat al die herwinningsmateriaal in die deurskynende sakke geplaas word. Sonder die publiek se samewerking kan die program nie slaag nie.

Inwoners moet hulle ook self vergewis van waar die aflaaipekkie vir tuinvullis en ander vuilnis in hulle areas is. Munisipaliteit Overstrand doen sy bes om dit so maklik as moontlik vir inwoners te maak om ontslae te raak van hulle vuilnis, maar daar vind steeds onwettige stortings plaas.

Dae van vuilnisverwydering in die verskillende areas:

ADMINISTRASIE	AREAS	VERWYDERINGS DAG
Kleinmond	Kleinmond, Bettysbaai, Pringlebaai en Rooiels	Maandag
Hermanus	Vermont, Fisherhaven, Hawton	Maandag
	Onrus, Chantedclair, Berghof, Sandbaai, Hemel-en-Aarde	Dinsdag
	Zwelihle, Mount Pleasant	Woensdag
	Westcliff, Northcliff en Hermanus Industriële Gebied	Donderdag
	Voëlklip, Eastcliff, Hermanus Heights en Kwaaiwater	Vrydag
Stanford	Stanford	Donderdag
Gansbaai	Pearly Beach, Buffeljagsbaai en Eluxolweni	Maandag
	De Kelders, Masakhane en Beverly Hills	Dinsdag
	Franskraal	Woensdag
	Kleinbaai en Baardskeedersbos	Donderdag
	Gansbaai, Masakhane en Beverly Hills	Vrydag

Vullissakke mag slegs op die sypaadjie uitgesit word op die dag van vuilnisverwydering. In probleemdiergebiede moet dit in 'n probleemdierebestande vullishouer wees.

Een 240ℓ "wheely bin" of vier swart vullissakke mag uitgesit word waarvan slegs een tuinvullis mag wees (en daar mag geen sand en klippe by die tuinvullis ingesluit wees nie). Daar mag onbeperkte hoeveelhede herwinningsakke uitgesit word.

Karwyderskraal, die streekstortingsterrein, is nog nie in bedryf nie en alle vuilnis van die hele Overstrand-area word nou steeds teen groot ontkoste na Gansbaai vervoer.

'n Vreugdevolle feesseisoen word u toegewens en 'n beroep word op alle inwoners gedoen om verantwoordelik met hulle vuilnis te wees. Plaas nat vuilnis in swart sakke en herwinbares in deurskynende sakke, en geen rommel in ons pragtige natuurskoon omgewing nie!

MUNISIPALE WARMWATERSILINDER-PROJEK VERG U ONDERSTEUNING

Die warmwatersilinderbeheerprojek wat tans deur die Munisipaliteit

Overstrand en Eskom in Hermanus, Kleinmond, Gansbaai, Stanford en Hawton onder-neem word, begin nou spoed optel. Inwoners word bedank vir hul samewerking wat ons in staat gestel het om teen einde Oktober reeds 2 800 van die beoogde 6 400 eenhede te kon installeer.

'n Beroep word weer eens op inwoners gedoen om die projek te ondersteun. Beheertoestelle word aan warmwatersilinders gekoppel wat die munisipaliteit in staat sal stel om kragvoorsiening aan die toestelle in tye van hoë elektrisiteitsaanvraag te kan beheer. Warmwatersilinders sal byvoorbeeld tussen 18:00 en 20:00 afgeskakel word om die las op die elektrisiteitsnetwerk te verminder.

Die firma Powertech IST, 'n energie-dienstemaatskappy, is aangestel om die program in Hermanus, Kleinmond, Gansbaai, Stanford en Hawton te implementeer. Volgens mnr Gerard van der Merwe, Bestuurder: Diensverskaffers, Munisipaliteite en Komersiële Besigheid by Powertech IST, sal opgeleide installateurs huise in hoëverbruiksareas

besoek.

Die volgende prosedure word gevolg:

a) Die beheertoestel word langs die distribusieoord in die huis geïnstalleer. Voorsiening word vir so 'n installasie in die munisipale elektrisiteitsverordening asook nasionale wetgewing (Wet op Elektrisiteitregulering, Wet 4 van 2006, Regulasie R773) gemaak.

b) 'n Kontrakteur wat by wyse van 'n identiteitskaart van die munisipaliteit, Eskom and Powertech IST geëien kan word, sal die toestel installeer. Dit kos niks en duur ongeveer 20 minute. Die kragtoevoer na die huis sal voor die installasie afgeskakel word en weer aangeskakel word wanneer die installasie afgehandel is.

c) Die kontrakteur werk nie aan die warmwatersilinder self nie en die installasie het geen effek op elektriese toerusting of huishoudelike toestelle nie.

Meer inligting kan verkry word deur 'n oproepsentrum by 083 228 0268 te skakel. U kan ook die munisipaliteit se webtuiste besoek op www.overstrand.gov.za om meer besonderhede van wetgewing te bekom.

AFVAARDIGING BESOEK KOEBERG

Op 30 Oktober 2012 het 'n afvaardiging bestaande uit raadslede en amptenare die Koeborg-Kernkragentrale besoek op 'n feitesending om groter begrip te verkry oor hoe so 'n fasiliteit moontlik op ons in die Overstrand kan impakteer. Die afvaardiging is voorgelig deur 'n span kundiges van ESKOM wat alle vroeë reguit beantwoord het en met voorbeelde kon toelig.

Kwessies ter sprake was die veiligheid van sodanige installasies, noodprosedures en die impak op die omgewing asook die ontbrekende infrastruktuur wat voorsien moet word. Daarna is die afgevaardigdes geneem op 'n begeleide toer deur die fasiliteit en die omliggende omgewing wat op die 3000ha stuk grond geleë is.

Die besoek is nodig geag omdat een van die terreine wat vir 'n moontlike toekomstige kernkragentrale geïdentifiseer is, Bantamsklip, in Overstrand geleë is.



Junior Raad: Voorste ry van links: Bianca de Koning, Faeza Abrahams, Layla Arrison, Uitvoerende lid (Curro Hermanus), Abigail Swartz, Uitvoerende lid (Hawston), Jacques Hanekom, Uitvoerende lid (Kleinmond), Esvory Esterhuizen, Uitvoerende lid (Mount Pleasant), Kim Bishop, Junior Onderburgemeester en Uitvoerende Lid (Stanford), Burgemeester Nicolette Botha-Guthrie, Marlo Jacobs, Junior Burgemeester, Theo de Wet, Junior Raad-bestuurder, Anethemba Tyobe, Onderburgemeester en Uitvoerende Lid (Zwellihle), Dillon Arendse, Uitvoerende Lid (Northcliff House College), Shamima Brett, Uitvoerende Lid (Gansbaai), Sheldon Breda, Uitvoerende Lid (Hermanus) en Odwa Qobani; Agterste ry van links: Thembinkosi Mcinjana, Lunga Mdunyelwa, Marihé Erasmus, Anli Schroeder, Amy Cupido, Jovân Prince, Chrisam Witbooi, Yolisa Siyotywa, Joudin Rooi, Karel Keyser, Ciara Nel, Jack Swart, Johan Truter, Athena Spanellis, Linden Salies, Siphehile Liwani, Andisiwe Sonden, Asiphe Kefu, Sandra Muchanyana, Lochel Coetzee, Robyn Myburgh

BOU AAN ONS TOEKOMS DEUR DIE JEUG

Die jeug is ons land se toekoms en wanneer hulle eendag as politieke leiers oorneem, moet hulle die mees basiese voorwaarde vir vrede in ons land nastreef en koester, naamlik eenheid in ons diversiteit en volhoubare wyses om dit te bereik.

Hierdie gedagte wat gegrond is op 'n uittaling van die voormalige president, mnr Nelson Mandela, is deur Burgemeester Nicolette Botha-Guthrie gebruik in haar boodskap by die inhuldiging van die negende Junior Raad op Maandag 29 Oktober in die Overstrand-burgersentrum op Hermanus.

Sy het voorts gesê sy ervaar 'n gevoel van verwikking en entoesiasme wanneer sy die geesdrif en lewenslus van die lede van Overstrand se Junior Raad aanskou. Tydens die inhuldiging van die negende junior raad het verskeie van die uitgaande en inkomende lede op eie versoek musiekitems gelewer en kort toesprake gelewer.

Volgens haar is die beste manier om ons jeug vir die toekoms te bou, om leierskapontwikkeling te bevorder. Die ouer geslag is nie in staat om alles vooruit te sien en planne te maak nie. In tye van krisis en van verandering moet die leiers van die oomblik vorentoe tree, die rigting bepaal, die samewerking van ander verkry en hulle motiveer en aanspoor om die nodige aanpassings te doen en oplossings te vind.

Die diversiteit van ons gemeenskap vorm deel van die Overstrand se strategie

om die jeug vir toekomstige leiersrolle op te lei, het die Burgemeester gesê en hulle aangemoedig om oor die grense van kultuur, taal en ras uit te reik.

Daar moet daarna gestreef word om 'n sterk nuwe nasie te vestig op 'n stewige fondasie van goeie morele waardes, soos respek, betroubaarheid, verantwoordelikheid, regverdigheid, omgee en goeie burgerskap.

Dit gaan nie 'n maklike pad wees om te volg nie, maar dit is die regte een om die nodige vrede en samewerking te skep om vir ons land met sy ryk diversiteit 'n mooi en voorspoedige toekoms te gee.

Sy het haar dank teenoor die Enlighten Education Trust betuig vir 'n puik vennootskap met die uitvoering van hierdie taak.

Mev Botha-Guthrie het die uitredende bestuurder van die Junior Raad, mnr Theo de Wet gehuldig vir sy harde werk die afgelope nege jaar om die liggaam tot een van die bestes in die Wes-Kaap uit te bou.

Sy het teenoor die lede van die junior raad onderneem om vir hulle die steun te gee wat hulle nodig het om van die geleentheid 'n sukses te maak. Daar moet egter onthou word dat die voordeel wat hulle daaruit kan put, gaan afhang van hul bereidwilligheid om ten volle die geleentheid te benut. "Ek is oortuig daarvan dat julle jul beste gaan lewer," het die Burgemeester gesê. Die Junior Raad bestaan vanjaar uit 35 lede, wat uit ses skole kom en so ver as moontlik verteenwoordigend van Overstrand se geografiese gebied en gemeenskappe is.

WAPENSTILSTANDSDAGDIENS RAAK HARTE AAN

Ondanks die helder, sonnige dag, was vanjaar se Wapenstilstandsdagdiens op Sondag 11 November in Hermanus 'n plegtige geleentheid wat tot nadenke gelei het. Die oomblik wat teenwoordiges veral diep geraak het, was toe die 92-jarige George Dawson nader geskuifel het met die hulp van sy seun en 'n loopraam om 'n roos aan die voet van die Oorlogsmonument te plaas.

Die grys bebaarde Skot van geboorte wat nou op Onrus woon, is op 24 September 1940 tydens die Slag van Dakar krygsgevangene geneem en vir langer as twee jaar deur die Franse Vichy-magte in Wes-Afrika geïnterneer. Hy was die radio-operateur/sterskutter op 'n Fairley Swordfish Mk 1 dubbelvlekvliegtuig wat deel was van 810 Vlootlugskadrielje van die Koninklike Vloot. Van die bemanning van drie, was hy die enigste oorlewende toe die vliegtuig deur kuswagkanonne afgeskiet is terwyl hulle die Dakar-hawe genader het om vyandelike skepe aan te val. Hy is in 1942 bevry en het na Suid-Afrika geïmmigreer, waar hy na die oorlog met Hettie Krige van die Paarl in die huwelik getree het en vier seuns in Kaapstad grootgemaak het. Na sy aftrede het hulle hul op Onrus gevestig.

Mnr Harvey Saayman, die Old Bill van die Seagull Shellhole, die plaaslike tak van die Memorable Order of the Tin Hats wat die seremonie gereël het, het ook 'n ongetekende kaartjie wat die vorige dag in 'n pot rooi papawers by die monument gelaat is, voorgelees. Die name van "ons kosbare jong manne wat hul lewens vir hul land gegee het" is gemeld en die kaartjie is afgesluit met die woorde: "Ons het hulle lief gehad en onthou hulle steeds".

Vyftien organisasies en 'n twintigtal lede van die publiek het aan die kranselegging-seremonie deelgeneem, onder meer die Burgemeester van Overstrand, rdl Nicolette Botha-Guthrie, die Suid-Afrikaanse Polisiediens, verteenwoordig deur mnr Gordon vd Westhuizen, die Junior Burgemeester van Overstrand, Kol Patrick McLachlan van die Cape Town Highlanders, hoofseuns en -dogters van Hermanus Hoërskool, Curro Privaatskool, Hawston Primêre Skool, en Hermanus Laerskool, mnr John van Zyl van die Rhodesian Light Infantry Association, mnr Blair Gibson van die Flame Lily Foundation, die NSRI, Hermanus Old Boys en Hermanus Seekadette.



George Dawson en Burgemeester Nicolette Botha-Guthrie

SPORTKRAG OOR HELE OVERSTRAND VERSPREI

Die opwindende eindtoernooi vir die Burgemeestersbeker in vyf sportkodes op Saterdag 27 Oktober op Gansbaai het getoon dat Overstrand se sportkrag en talent betreklik eweredig oor die hele munisipale gebied versprei is.

Die mans sokkerkampioene is Early Birds van Gansbaai, die vrouesokkerkampioenspan is Siyadlala van Zwelihle, Kleinmond het met die rugbytrofee weggestap, Hawston met die krieketrofee en Hermanus was die wenner van die netbal.

Vir geen een van die kampioene was dit maklik nie, want benewens 'n fris suidooster wat soms stormsterk geword het, is daar kwaai teenstand deur hul mededingers gebied.

In sokker was die uitslag aan die einde van die speelyd 1 el vir Early Birds en die Zwelihle-span Real Attackers. Na die verpligte strafdoelsessie om 'n wenner te bepaal, was sake nog steeds gelykop deurdat niemand misgeskop het nie. Eers diep in die 'sudden death'-fase het Early Birds se knap doelwagter daarin geslaag om 'n skop te keer en kon die Gansbaaiers met vreugdeliedere hul spanning verlig.

Early Birds se Zwelelanga Nkosinathi was die speler van die toernooi en Lwado Tshaya was die top-doelskieter van die toernooi.

Op die rugbyveld het Kleinmond goed van die wind gebruik gemaak om hulle 'n voorsprong van 15 - 6 teen rustyd te gee, maar in die tweede helfte het Hawston met mening teruggekom nadat hulle in 'n stadium 27 - 11 agter was. Die eindtelling was 27 - 25.

Die speler van die toernooi was Wessel Arendse en die meeste drieë is deur Gerald October gedruk - albei van Kleinmond.

Wat die krieket (20/20-formaat) betref, het dit aanvanklik gelyk of Hawston die wensteiken van 83 lopies maklik gaan afjaag nadat die lopies gedurende die eerste paar boulbeurte gevloei het en net een paaltjie geval het. Mount Pleasant se bouslers het egter die krane begin toedraai en teen die einde kon Hawston sy oorwinning met slegs drie paaltjies staande behaal. Daar was nog 15 balle oor.

Hawston se Sergio Maddens, wat gereeld die geleentheid kry om in Engelse graafskapkrieket sy talent te slyp, is as man van die wedstryd aangewys en die speler van die toernooi was George Hlazo van Mount Pleasant.

In die vrouesokkerstryd het Siyadlala eers teen die einde daarin geslaag om die bal in die doelhoek te kry. Real Pioneers van Gansbaai se doelwagter het egter die toeskouers beïndruk met haar heldhaftige keerwerk. Die speler van die

toernooi was Sindiswa September en Nwabisa Heke die een wat die meeste doele aangeteken het.

Op die netbalbaan het Hermanus se sterk span sake heeltemal oorheers en Zwelihle met 32 - 11 geklop. 'n Mens moet toegee dat die Zwelihle-spelers eers 'n dag voor die wedstryd nadergetrek is nadat die Kleinmond-span haar onttrek het. Teen die einde van die wedstryd het Zwelihle hul ritme gevind en is Nosidima Poni van dié span as die beste doelskieter aangewys is. Jana Sprong van Hermanus was die speler van die toernooi.

Die 10km-padwedloop is deur Alfred Tshabeni van Whalers (Hermanus) in 36:05 gewen, maar 'n Gansbaaiër Nelson Ngese was deurentyd op sy hakke en het met die silwer medalje weggeloop. In die vroue-afdeling was die 14-jarige Jeanne Vermeulen (Bredasdorp-atletiekklub) die wenner en Franki Fouché van Gansbaai die silwermedaljewenner.

Gansbaai Primêr het die meeste leerdere opgelewer wat die pretdraf klaargemaak het en die Laerskool Gansbaai was die naaswenner.

Burgemeester Nicolette Botha-Guthrie was beïndruk met die goeie gees wat by die sportdag geheers het. Die ondersteuning het ontbreek, maar die gehalte van die sport het aan alle verwagtinge voldoen.



Early Birds is die 2012 Sokkerkampioene



Kleinmond wen die 2012 Burgemeestersbeker-rugbytoernooi



Siyadlala is die 2012 Vroue Sokkerkampioene



Hawston het die 2012 Burgemeestersbeker vir krieket gewen



Hermanus is die 2012 Netbalkampioene

SO SLUIT KANTORE IN FEESTYD

Met Kers- en Nuwejaarsdag wat vanjaar in die middel van die week val, gaan die kantoorluitings anders uitsien as gewoonlik. Munisipale kantore sal op Maandag 24 Desember 2012 en Maandag 31 Desember 2012 gesluit wees vir alle sake, buiten essensiële dienste, maar op die Vrydag voor elk van die lang naweke sal daar voldag gewerk word. Na die Kersdae open die kantore soos normaalweg op Donderdag 27 Desember en Vrydag 28 Desember. In die Wes-Kaap is die 2de Januarie ook 'n munisipale vakansiedag en sal daar eers weer op Donderdag 3 Januarie besigheid gedoen kan word.